

INUIT ATAQATIGIIT INATSIARTUNI



EM 2022/7.1

27.9.2022

Asii Chemnitz Narup

2023-mut Aningaasanut Inatsisissatut siunnersuut

(Aningaasaqarnermut Naligiissitaanermullu Naalakkersuisoq)

Partiip oqaaseqartuata saqqummiussinera: Aningaasanut inatsit nunarsuarmi pissutsit allanngorfianni – ullut nalorninartorfiusut ornippagut.

Qujanaq oqaaseqarsinnaaninnut.

Oqallinneq aappaagumullu aningaasanut inatsit.

Aammali aningaasanut inatsisissaq siunissamut ungasinnerusumut attuumassuteqartoq.

Siunissaq nalorninartooq, ukiunut qaangiuttunut arlalissuarnut naleqqiullugu nalorninarnerusutut ittoq siunissaralutigu.

Aningaasanut inatsit tassaavoq inuiaqatigiinni missingersuusiarpugut angisooq. Tassani sakkortoqisumik pingaarnersiuisarpugut.

Suut pisarnertut aningaasaliiffigineqassappat?

Suut/kikkut annerusunik pissappat?

INUIT ATAQATIGIIT INATSIARTUNI



Suut ilanngartuiffigalugit peerneqassappat – suut
pinngitsoorneqarsinnaappat...

Kalaallit Nunaat nukittoq aamma imminut tulluusimaarutigisoq Inuit
Ataqatigiit kissaatigaat, Kalaallit Nunaat namminiilerluni
kiffaanngissuseqalersussaq, inuusuttai ilinniagaqarluarsimasuusussat,
naligiinngissutsip atuukkunnaarfigisimasaa – uaguunitsinnillu kalaaliunitsinnik
attassiinnaraluarluta – nunarsuarmioqatigiinnut peqataasoq.

Inuussutissarsiutit ineriartortinneqarnissaannut akisussaaffimmik
tigusinissarput suliffissanillu pilersitsiortorluta..... aamma inissianik pitsaasunik
peqqinnartunillu inuttaasunut tamanut pilersitsissasugut.

Meeqqanik atornerluisarneq unitsinneqarluinnassasoq, aamma arnanik
persuttaasarneq....

Inuit Ataqatigiit Nunatta aningaasarsiornikkut naalakkersuinikkullu imminut
napatinnerulernissarput sulissutigaat, tamannalu piujuartitsinermik
tunngaveqarluni ingerlanneqassaaq. Aningaasaqarnermut politikki
naligiinnerulernissamut aqutissiuissaaq, piitsuusutsimut akiutaassalluni,
innuttaasullu naligiillutik inuiaqatigiinni iluaqutissanik pissarsinissaannut
aqutissiuissuussalluni. Innuttaasut naalakkersuisooqataanerannut
ineriartornerannullu periarfissaannik aqutissiuqataassaaq, inuiaqatigiinnilu
ataqatigiinnerup kiminganik nukittorsaaqataassalluni. Inuit pineqarput.

Aningaasarsiornierup qaffassarneqartuarluni ineriartortittuarnissaa Inuit
Ataqatigiit pingaartitaraat. Qaffassaalluni ineriartortitsineq kisiat
peqqutiginaq, kisiannili atugarissaarnissaaq qulakkeerniarlugu, inuit tamarmik
pisinnaasaminnik pikkoriffimminnillu inerisaasinnaanissaat qulaakkeerniarlugit,
suliffeqalernissaat imminnullu pilersugarilernissaat qulakkeerniarlugit,

INUIT ATAQATIGIIT INATSIARTUNI



atugarissaarneq pigissaarnerlu qulakkeerniarlugit. Tassa, aningaasaqarnermi inuit pineqarput.

Piffissami matumanerpiaq nunatsinni aningaasaqarniarnerput tunngavimmigut pitsaasumiippoq. Aningaasarsiornikkut ingerlalluarpugut, ukiumilu tullermi aningasarsiornitta 1 % qulaatilaarlugu qaffakkiartuinnarnissaa ilimanarpoq. Assiliarli taanna sukkasuumik allanngoriataarsinnaavoq.

2023-imummi Aningaasanut Inatsisissap ullumi siullermeerlugu oqaluuserinerani, inissisimaffipput immaqa nalitsinni ilungersunartorsiornerpaaffitsinniippoq.

Kalaallit Nunarput kisiat immikkuullarissumik isigalugu, imaluunniit Aningaasanut Inatsisissatut Naalakkersuisut siunnersuutaat pillugu, taama oqanngilanga.

Siunnersuummi ajoriinnagassaangvivippoq.

Qeqertamili allanut attaveqanngitsumi inuunngilagut, assortorneqarsinnaanngitsumilli nunarsuarmioqatigiinni inuiaqatigiissuarnut akuulluta inuuvugut. Nalitsinnilu aatsaat taama nalornisartorsiorfigalunilu ulorianartorsiorfiutigaluni nunarsuarput maanna inissisimavoq.

Qullit mianersoqqusissutit ikeqattaartuarput. Taakku mianersorfigalugit puornaveersaartariaqarpavut – aamma uani ullumi oqallisigisassatsinni.

Ruslandip Ukrainemik saassusinerata malitsigisaanik nukissiutit aamma inuussutissat akii nunarsuarmi tamarmi qaffariarujussuarput. Aningaasat pisussutaasinnaanerisa nalingi malunnaatilimmik appariarsimapput, akit qaffariartupiloorput. Aamma Kinap Covid 19-nertunut mattussisarnerata

INUIT ATAQATIGIIT INATSIARTUNI



malitsigisaanik nunarsuatsinni niueqatigiinnermut aningaasarsionermullu allanngortitsivoq.

Nukissiutit aamma nerisassat akiissa qaffarujussuarnerisa aamma aningaasat nalikillipiloornerisa malittaaniq uagut aamma eqqorneqartussaavugut. Nerioqqutissat ulluinnarsiutaasut akiissa qaffanneri angerlarsimaffipassuarni malugineqalereerput. Sunniutipiluilu millisinniarlugit Naalakkersuisut suliniuteqalereerlutik.

Piffissaagallartillugu silatusaartumik iliuuseqarnissinnut qujanaq.

Arlaannaataluunniit eqqoriarsinnaangilaa qanoq sivilutigisumik Rusland Ukrainemut sorsunniarnerisq. Tamanna nunarsuatsinni nunatsinnilu aningaasarsionerup ineriartornissaanik nalorninartorsiortitsisorujussuuvoq. Europami USA-milu inoqarpoq isertitaminnik ima sukkatigisumik annaasaqartunik, nunarsuatsinni taama ittunik ukiorpassuarni naammattuugaqarsimangisaannarluni.

Taamaattumik akisussaassuseqartumik eqqarsarluarsimanissamillu tunngaveqartumik Naalakkersuisut kajumissaarinerannut Inuit Ataqatigiit tunuliaqutsiipput. Piumassuserput, aamma pingaarnersiusinnaassuserput sakkortuumik maanna misilinneqarput.

Silap pissusaata ajornartorsiortitsinera

Assortuussutaajunnaarpoq. Nunarsuatsinni naalagaaffiit aamma taakku siuttuisa tamarmik assigiimmik nassuierutigaat, nunarsuatsinni silaannaap kissatsikkiartornera piviusuusq. Pinngortitaq naalliutsinneqarpoq, silallu pissusiaita allanngornerata malitsigisaanik inooriaatsit aamma inuuniniarnissamut periarfissat inuiaqatigiippassuarni allanngorput. Nunarsuatta, uumassusillit tamarmik paarilluarneqarnissaannut, minnerunngitsumillu siunissami kinguaariumaakkatta inuusinnaanissaminnut

INUIT ATAQATIGIIT INATSISARTUNI



tunngavissaqarnissaannut malittarisassanik arlalissuarnik Naalagaaffiit FN-imut ilaasortaasut tamarmiullutik aalajangersagaqarput: Piujuartitsisumik ineriartortitsinissaq anguniarlugu nunarsuarmioqatigiit siunniussaak 17-usut.

Ilisimatuut mianersoqqusillutik suaartalinngikkallarmatali, nunarsuatta kissakkaluattuinnarnerata malitsigisaanik, piniartortavut aamma aalisartortavut maluginiagaqaqaartunut ilaapput. Silap allanngornerani pissutsit malugaat, piniagassat allamut ingerlaarneri, periusaasalu allanngorneri takuaat. Nunaminertat siornatigut takuneq ajukkavut puttussuupput, sermersuup aakkiartornerata malitsigisaanik.

Silap pissusiata allanngornerata malitsigisaannut silatumik nalimmassarnissarput pisariaqarpoq, avatangiisinut pinngortitamullu mianerinninnissamut malittarisassat nutaat suliarineqartariaqarput.

Naalagaaffiit Peqatigiit nunarsuarmioqatigiinnut siunnerfiliaat 17-usut sakkussatsialaasut Inuit Ataqatigiit isumaqarput. Immitsinnut pisussaaffilertariaqarpugut siunertat taakku ersarinnerusunngorlugit uatsinnullu inuiaqatigiinnut naleqquttunngorlugit suliarinissaannut.

AIS 2023

Ukiuni 2023 aamma 2024-imi amigartoortoqassasoq, 2024 aamma 2025-imi annikittunnguanik sinneqartoornissaq Aningaasanut Inatsisissatut saqqummiussami siunnersuutigineqarpoq.

Tunngaviatigut Inuit Ataqatigiit tapersiinertik matumuuna nalunaarutigissavaat. Atugarissaarnermut ilaatigullu peqqinnissaqarfimmut pitsanngorsaatissanik pisariaqartunik aningaasanut inatsisissatut siunnersuutip imaqarnera peqqutigalugu, aammali peqqutigalugu missingersuusiortarnermut aamma naatsorsuutinik inatsisitigut

INUIT ATAQATIGIIT INATSIARTUNI



oqimaaqatigiissutsimik/sinneqartoornissamik piunasaqaataasut
naammassineqarmata.

Isertitassat appariarnissaat - akileraartarnikkut akitsuutigullu
isertinneqarumaartut appariartornissaannik - Naalackersuisut mianersortumik
nalilersuisimani maluginiarparput. Taamatut missingersuusiortumut suut
tunngavilersuutigineqarsimanersut itisileqqullugit Naalackersuisoq
qinnuigissavarput. Niueqatigiinnissamut Tuluit Nunaannik suli
isumaqatigiissusiortoqarsimannginnera kisimi tassunga peqqutaava
imaluunniit pissutsit allat tassunga peqqutaasimanerlutik?

Suliniutit nutaat

Naalackersuisut suliniutissanut nutaanut siunnersuutaat Inuit Ataqatigiit
ilassilluarpaat. Meeqqat inuusuttullu toqqissimallutik meeraanissaannut
inuusuttuunissaanullu siunertat qaffassissumik pingaartinneqarput. Dronning
Ingridip Napparsimavissuani meeqqanut immikkoortortavissamik
pilersitsinissaq nuannaarutigingaarpaput. Pisariaqartitsineq tamanna
ukiorpassuarni ilisimaneqarsimavoq. Maanna qanoq iliuuseqartoqarnialerpoq.
Qujamasuutigaaput tarnikkut/eqqarsaartaatsikkut nappaatit timikkut
nappaatitullu eqqumaffigineqarmata, kiisami. Tamatumuunakkut katsorsaaneq
pinaveersaartitsinerlu pitsaanerujussuusariaqarpoq!

Eqqumaffigisariaqarparpulli sulisussarsiortarneq sulisooreersunillu
atorfeqartitiinnartitsiniartarnikkut ajornartorsiuteqarnerput. Inuit Ataqatigiit
Naalackersuisut qinnuiginiarpagut aalajangersimasumik sulisunik
amerlanerusunik atorfeqartitsinissamut ilungersuuteqarnertik
ingerlatinnaqqullugu.

INUIT ATAQATIGIIT INATSIARTUNI



Inuit Ataqatigiit eqqaasitsissutiginiarpaat meeqqanut, ilaqutariinnullu meerartalinnut, 'siusinaarluni iliuuseqartarneq' taamaallaat inunnik isumaginninnermik suliassaqarfimmit susassaqarfigineqanngimmat aammali peqqissutsikkut sulisorisanik akisussaaffigineqarmat. Tamaattumik matumani periusissiap suliniutissallu naammassineqartinniarnernani sulisut, assersuutigalugit ernisussiortut aamma 'meeralerisut/sundhedsplejerskit', pingaaruteqarluinnartumik inissisimapput.

Imminut toquttarnerup pinaveersimatinniarnernata suli pitsanngorsaavigineqarnissaanut 1,3 mio. kr-inik siunnersuuteqarneq siunnersuutaavoq pitsaasoq. Nutaanik aningaasaliineq imminortartut malunnaatilimmik ikinnerulernerannik kinguneqarilitoq, tassami ilaqutariippassuit inuiaqatigiillu tamarmik ukiut tamaasa alianaqisumik eqqorneqartaratta.

Naak ilinniartitaanermut aningaasaliissutit amerlasoorsuunngikkaluit, pitsaasuusutut nalilerpavut. Minnerunngitsumik Tasiilami inuutissarsiutitigut ilinniagaqalersinnaanermik - ukiorpassuarni kissaataasimasoq - ukiuni aggersuni nammassiniarneqarsinnaalissammat.

Inuiaqatigiit ukiorpassuarni sulisussanik ilungersunaqisumik amigaateqarfigisaanni: nakorsat, peqqissaasut, perorsaasut, peqqissaanermut assistentit il.il. ilinniartitsissutigineqarnissaannut pingaarnerutillugit, ukiuni tullerni, ilinnialertartut amerlineqarnissaat siunertaralugu, aningaasaliissutit amerlineqarnissaat, Inuit Ataqatigiit kaammattuutigivaat.

Aaqqissuusseqqinnissanut suliniutit

Inuiaqatigiinni naligiinnerulernissaq aamma piitsuussutsip akiorneqarnissaa Inuit Ataqatigiit pingaartilluinnarpaat. Naligiissuseq atituumik paasillugu: aningaasarsiornikkut, ilinniartitaanikkut, inuussutissarsiornikkut, tamat

INUIT ATAQATIGIIT INATSIARTUNI



oqartussaaqataanikkut. Ataqqinassutsikkut naligiissuseq, ataqqeqatigiinneq aamma inuit ataasiakkaat peqatigiinnermut pingaaruteqarsusiisigut.

Aningaasarsiornikkut naligiinnerulernissamik apeqqut eqqarsaatigalugu Naalakkersuisunik aamma Inatsisartuni partiinik allanik, akileraartarnikkut aaqqissuuseqqinnissaq pillugu, suleqateqarnissarput qilanaaralugulu erinigaarput. Aallartinnissarput utaqqisinnaanngingajapparpulluunniit. Inuit akileraartugisartagaat aamma suliffeqarfiit akileraartugisartagaat tamarmik, Akileraartarnermut malittarisassani nutaassani, ilanngunneqassasut naatsorsuutigilluinnarparput. Akileraartarnikkut aaqqissuuseqqinnermut aamma ilanngunneqartariaqarpoq nukissiutitut mingutsitsinngitsunut ikaarsaarnissamut tunngasut. Malittarisassanik pisariitsunik naapertuilluartunillu peqarnissap Naalakkersuisut oqariartuutaat tusaavarput.

Inuiaqatigiitsigut ilinniagaqarluarsimasutigut, suliffissaqartitsiniarnermi pitsaasumik ineriartorfiusimasumi, suliffissanik pitsaasunik periarfissaqartitsinertigut, naligiinnerulernissap qulakkeerneqarnissaa isumaqataaffigaarput.

Ilinniargaqarnissamut periarfissat assigiissut inuusuttatsinnut pilersissavavut meeqqat atuarfianni patajaatsumik atuartitsisarnertigut. Aningaasaqarnermut Nunatta Siunnersuisoqatigiivisa (GØR) ukioq manna nalunaarusiaminni ilanngussimavaat pissutsit suut meeqqat atuarfiini naligiinngitsunik periarfissaqartitsilersarnersut.

Inatsisartut Naalakkersuisullu suleqatigiillutik, ataatsimoortumillu isiginnillutik, Aningaasaqarnermut Siunnersuisoqatigiit kajumissaarutaattut suliaqarnissaat Inuit Ataqatigiit kissaatigaat. Meeqqat Atuarfiannut sammisaqarnerannut Siunnersuisoqatigiit qutsavigaavut. Ilisimalikkat Siunnersuisoqatigiit saqqummiussaata pisussaaffiliipput.

INUIT ATAQATIGIIT INATSIARTUNI



Aningaasanut inatsisissamut siunnersuutikkut Naalakkersuisut aaqqissuusseqqinnissanut nutaanut siunnersuuteqanngitsut Inuit Ataqatigiit maluginiarpaat. Tamanna tusaatissatut tiguarparput, manna peqqutiginnarlugu, Attassisinnaanermut ineriartortitsinermullu II-kut ataatsimoortumik aaqqissuusseqqinissaamik Naalakkersuisut pilersaaruteqarmata.

Pisortat aningaasartuutaat isertitassaniit amerlanerupput. Attassisinnaanermut ajornartorsiut siunissami pilersussatut inngilaq. Piulereerpoq!

Partiinut tamanut Inuit Ataqatigiit kaammattuutaat ima nipeqarpoq: Ajornartorsiutip ilungersunarnera akuerlutigu, angusaqarluarumalluta suleqatigiitta, piffissamut ungasinnerusumut atasussamik politikikkut aningaasarsiornikkut atugarissaarnissakkullu nutarteraluta suliniuteqarluta.

Akiligassat meeqqatsinnut ernuttatsinnullu ingerlateqqissanngikkutsigit pisariaqarpoq aningaasarsiornikkut siuarsaanissarput aamma misissoqqissaartariaqarparput aningaasat ullumikkut isumalluutivut qanoq iliorluta allatut/pitsaanerusumik atorsinnaanerlutigit.

Piujartitsisussamik aningaasarsiornikkut siuarsaaneq/ Inuussutissarsiutinik ineriartortitsineq

Inuit Ataqatigiit isumaqarput inuussutissarsiutit ineriartortinneqarnissaannut sinaakkutissat qulakkeerneqarnissaat nukinginnarsisut. Periarfissatsialaat tassaapput nukissiorfinnut mingutsitsinngitsunut ikaarsaarnissaq aamma takornariaqarneq.

Inatsisartut ukiaanerani ataatsimiinneranni kingusinnerusukkut, Inatsisartuni partiit periarfissaqassapput – piujartitsisussamik takornariaqarnerup ineriartortinneqarnissaanut Inuit Ataqatigiit apeqquteqaat aallaavigalugu oqallinnissamik siunnersuuteqarnerisigut – politikikkut oqallisigalugillu

INUIT ATAQATIGIIT INATSIARTUNI



isummersorfigissallugit, akisussaassuseqartumik takornariaqarnermut politikkeqarnissaq sunik siunertaqarlunilu tunngaveqassanersoq. Oqallinnissaq pissaaq 16 november.

Ikummatissat akiisa qaffakkaluttuinnarnissaasa ilimanarluinnarnerisigut, aamma nunat amerlaneruleralluttuinnartut CO₂-mut akitsuusiisarnissamik piunasaqalernerisigut, timmisartorluni angalasarnerit akisunerulersussaapput. Tamannalu pivoq piffissami uagut mittarfissualiortitsernitigut silaannakkut attaveqatigiinnerup pitsanngorsaaviginerulernerisa nalerpiaani. Takornarissanik amerlanerusunik tikilluaqqusisinnaalernissatsinnut tunngaviginiakkavut qaammatalunnguit ingerlanerinnaanni allanngorluinnarput. Taamaattumik Inuit Ataqatigiit apeqquteqaat aallaavigalugu oqallinnissamik siunnersuutaat piffissaq eqqorlugu saqqumiussaavoq.

Aatsitassarsiornikkut suliniutit 9-it ingerlalluartut isumalluarfigaavut, (takuuk Aningaasaqarnermut Siunnersuisoqatigiit nalulnaarusiaa 2022). Naak ilisimaarigipput nunarsuarmi aatsitassanut akit appararataartartut, taamaalillunilu aatsitassarsiorneq inuutissarsiutitut qajannartuusoq.

Inuussutissarsiutitigut aaqqissuusaanitsinni aalisarneq suli sukarsuit pingaarnersaattut inissisimavoq, aalisakkanik qalerualinnillu avammut nioqquteqarnerput 5 mia. kr-nit missarluinnaaniilluni.

Aalisarnermut isumalioqatigiissitap suliaa annertoq nutaamik aalisarnermut inatsimmik malitseqartussaavoq. Pingaaruteqarluinnarpoq tamattaalluta paaseqatigiinnissarput aamma nutaamik inatsisiliornissarput, pingartormi – aalisarneq - tassaamat aningaasarsiornitsinni ingerlatsisorput pingaarnerpaaq.

INUIT ATAQATIGIIT INATSISARTUNI



Inuussutissarsiutit ineriartortinneqarnerini sinaakkutissani avatangiisinut silallu pissusaanut mianerisariaqakkat qularnaalluinnartumik ilanngunneqassapput. Silap pissusiata allanngoriartorneranik malussareqisumut nunavissuarnut nunarput attaveqarpoq, silaannaap kissatsikkiartornerani allannguutini annertoqisunik eqqorneqartunut: anorersuarnik, panernersuarnik, orpippassuarnik ikuallattunik, nerisassaarulluni perlerfiusuni, qarsutsinersuaqarfiusuni, assigisaanillu ajunaarfiusartumut. Aaqqissutissanut amma peqataasariaqarpugut. Nunatsinnit assersuutissaqarpugut, arfininngornerup unnuaani Tasiilami piteraqaq.

Nukissiutitut mingutsitsinngitsunut ikaarsaarniarneq ineriartortittariaqarpoq. Arlalissuarnik erngup nukiliorfiusinnaasunik peqarpugut, naannattorsuarmik imermik peqaratta, nukissiorfiit nunatsinni najugaqartunut iluaqutaasussaapput aamma nukik pilersitaq avammut tuniniarneqarsinnaavoq. Ikummatissat mingutsitsisut, piaarnerpaamik ATORUNNAARTARIAQARPAVUT.

Ernumassutigisat

-Aserfallattaaliornissamut kinguartooqqasuutivut annertoorujussuupput. Qanoq annertutigineri maanna qujanartumik qulaajarneqareerput avammullu nalunaarutigineqareerlutik. Milliardinik taamannanik pisariaqartitsinerput immineerluni allamut qiviarnernnatsigut imaluunniit nipangiusimaannarnitsigut tammarnaviangillat. 'Putut matussutissaannik' qanoq iliorluta pissarsiniarnissarput, oqallinnissaq pingaaruteqartoq, Aningaasaqarnermut Ataatsimiititaliami oqaluusereqqittariaqarparput, Naalakkersuisut qanimut oqaloqatigiutigalugit.

-Isertitat ikiliartorneri.

-Nunarput qimallugu aallarartut. Aningaasaqarnermut Siunnersuisoqatigiit, nunatta inuisa amerlassusaannik, Nunatsinni Naatsorsueqqissaartarfiup

INUIT ATAQATIGIIT INATSIARTUNI



kisitsisaatai innersuussutigai. Kisitsisit taakku najoqqutaralugit 2050-imi nunatta inuisa amerlassusaat 48.400- innanngorsimassapput.

-Sulisinnaasunik amigaateqarneq suliassaqaarfinni tamani maanna ersarissereerpoq. Inuit Ataqtigiinni isumaqarpugut unammilligassaq taanna illerngit marluk atorlugit qaangerniassagipput: innuttaasut tamarmik ilinniagaqalersinnaanerak qulakkeerneqassasoq aamma paasinaqqissaartariaqarparput atorfiit uagut nammineq inuttalersinnaanngisavut, qanoq iliorluta nunanit allamiunit inuttalersorneqarsinnaalernissaat.

-Allaffissornerujussuaq. Pisortat suliffeqarfiutaanni sulisut amerliartorput, namminersorlutillu suliffiutilinni sulisut ikiliartorlutik. Allaffissornerujussuup millisarneqarnissaa ukiorpassuarni oqallisaasimavoq. Minnerunngitsumik allaffissornerup marloqiusamik ingerlanneqartup unitsinneqarnissaa eqqartorneqartarsimalluni. Qanorli iliortoqarani oqaasiinnarmiissimavoq. Allanguinissamut pilersaarummik saqqummiussisoqartariaqarpoq. Innuttaasut peqataatittariaqarpavut, taamaasiornikkut amerlanerusut atorfeqarnermikkut imminnut nutaamik pilersaarusiorsinnaalersillugit aamma inuunermi pivirusumik allanguisinnaalersillugit. Ima paasisariaqarpoq inuit amerlanerusut kommunini namminersorlutillu oqartussani suliffitik allanik taarsersinnaasariaqarpaat, suliffeqarfinnut namminersortunut ikaarsarlutik. Immaqa ilinniagarisimasamik iluini, immaqaluunniit allarluinnarnut nuullutik. Taamatut allanngortitsinissamut piumasaqaatit marluupput: 1) Nutaanik atorfinitsitsisarneq eqqarsaatigalugu, pisortat suliffeqarfii unikaallattariaqarput aamma 2) suliffeqarfiit namminersortut pikkorinnerulertariaqarput pisortat suliffiutaanni sulisunik atorfinitsitsisinnaalernissaminnut. Pisortat suliffeqarfiutaat kisimik nutaanik eqqarsaasersussanngillat, aammali suliffeqarfiit namminersortut nutaaliortariaqarput.

INUIT ATAQATIGIIT INATSISARTUNI



Naalakkersuisut qinnuigissavavut qulequttat taakkartukkagut suleriaqqinnissami kingunissalimmik ilannguteqqullugit.

Kalaallit Nunaat imminut napatittoq

Partiit allat assigalugit, Inuit Ataqatigiit Nunatta aningaasarsiornikkut naalakkersuinikkullu imminut napatinnerulernissaa sulissutigaa, tamannalu piujuartitsinermik tunngaveqarluni ingerlanneqassaaq. Nalliuttorsiulaarnerni persuarsiorluni oqalugiarnernarni tamatuma oqaatigineqartarnera naammangilaq.

Isumaqarpugut maanna piffissanngortoq partiit akunnitsinni tamanna sukumiisumik oqallisigissagipput, ersarissumillu oqaasertalerlugu imminut napatinneq qanoq paasineqassanersoq aamma aalajangiiffigalugu, siunissaq ungasinnerusoq isigalugu, imminut napatinnerulernissamut periussissaq suussanersoq. Aningaasanut Inatsimmi isertitatta 58%-tii avataaniit pissarsiarisarpavut. Taakkunanngaanniit immitsinnut pituussaartariaqarpugut. Tamannali ullormiit ullormut pissangilaq aamma pisinnaangilaq. Pisoqarnaviangilarli, pitsaanerpaamik pisoqarnissaanik kissaateqaarusaaginnaraluarutta sussanatalu, neriullutaluunniit allat tamanna uatsinnut aaqqillarumaaraat.

Aningaasarsiornikkulli imminut napatinnissamut anguniagaqarnitsinni, isumalluutissatuaraavut uagut immitsinnut – allat pinnagit uagulli kisitta – meeqqatta ernuttattalu siunissaat pillugit, inuiaqatigiinni suliaqarluta aallartittariaqarlunnarpugut. Tamannalu pissaaq piffissami silap pissusaata allanngorfiani, ikummatissaqarniarnerup nerisassaqarniarnerullu ajornartorsiorfiunerisa nalaani, aningaasat naleerukkiartorfiini, sakkutuulersornertigullu pissanganartorsiornerit nunarsuatta siunissaanik takorlooruminaatsitileruttorfiata nalaani. Uagullu eqqorneqanngitsoornaviangilagut.

INUIT ATAQATIGIIT INATSIARTUNI



Qanoq iliuuseqarata uninngaannarsinnaangilagut. Pissutsit ilungersunarput, aatsaallu aallartilaarput. Uninngaannarnissarli periarfissaangilaq.

Nunatta aningaasarsiornikkut imminut napatinnissamut suliniut
Aningaasaqarnermut Ataatsimiititaliami peqqissaartumik sammineqalissasoq
Inuit Ataqtigiiit kissaatigaat. Aningaasaqarnermut Ataatsimiititaliaq
tassaannaassangilaq isumaliutissiissutinik allaagaqartartoq, aammali partiit
akimorlugit politikikkut ineriartortitsiviulluni naatitsivittut ingerlasariaqarpoq.

Nunarput imminut napatinnerulernissaanut timitalernissaanut suleqataasa!

Oqallilluarisa.